

## 打茅波

各位觀眾，今日香港大球場的「民主盃」總決賽現在開始，兩隊強隊亦先後入場。首先入場的是「艇仔」隊，雖然他們人仔細細，但係朝氣勃勃，鬥志堅強，他們向觀眾舉手示意，贏得一陣掌聲。隨後出來的是高頭大馬的「皇冠」隊，他們人強馬壯，面色凝重，兇神惡殺，舉手投足充滿火藥味。好啦好啦！他們排開陣勢，艇仔隊是四三三全攻型，而皇冠隊則好似十上十落的波浪陣勢，又好似四二四的守勢波。今次雙方陣勢分明，必然大把嘢睇，包有走雞！

中圈開波，雙方在中場略加盤扭，突然在艇仔隊陣勢散開之際，皇冠隊中衝出一個十號仔「拉人老蒼」，一招擄雞腳搶咗個波，用驚人速度左腳交右腳、右腳交左腳單刀直入艇仔隊禁區，在無人看管之下大腳抽射，守門員一時大意，個波破網而入，「七哥」一比零。（一月七日被捕）哎呀！真係有陰功，上半場一分鐘就輸咗一球，艇仔隊今次就真運滯！

話口未完，艇仔隊反攻，立即來一個遠射（市政局議員一月十一評擊），又迫得一個角球（十二日十多團體抗議），打到皇冠隊呆過曹達華，只好全面防守密集，以防萬一。艇仔隊在左邊路綫進攻，由前鋒「學生哥」勁射，這一腳雷霆萬鈞，像炮彈一樣（一月十六日二百人靜坐），皇冠隊守門員「政治部」上前封位已封不住，球兒應聲入網！好嘢！一比一打和！全場掌聲轟動！

艇仔隊得勢不饒人，立即要求換人，換入左翼「英國議員」，這個三號仔認真夠威，橫衝直撞無人能擋，但又睇得通，交波俾「上議院」，又交俾「下議院」，在離門五十碼外之二閘扣射。嘩！真係靚過朱玲玲！

此球拋物綫形向皇冠隊龍門飛去，冇得擋，真係冇得擋！龍門都摸唔到角度，皇冠隊員眼光看看這個波由高處香蕉式地笠入，聲都有得聲（一月尾英國議員質詢）。二比一艇仔隊超前！

皇冠隊不甘受辱，三十五分鐘組織攻勢，墮後中鋒「新聞部」上前助攻，充當輸送管。佢正一古惑仔，輸到波就送上前（二月二十三日發表聲明）。六號仔「殖民大臣」神高神大佔盡優勢，又表演帽子戲法，用膊頭又用膝頭，跟住一個假身，頭鎚輕搖，艇仔隊守門員飛身撲到盡晒都唔掂，被「殖民大臣」輕易頂入，成為二比二打和！（殖民大臣答辯上下議院質詢）。

重剩番八分鐘，艇仔隊反攻，但是門前擾攘一番，無功而回。

換邊再戰，下半場開始。艇仔隊重整陣容，後防球員眉來眼去，睇死佢地必然裝越位陷阱。好啦！依家佢地在左路策動攻勢，右翼「余律師」短傳滲入，「余律師」認真夠「忽」，件波衫上印着REASONABLE EXCUSE這兩個英文字，滋滋油油帶波直上。球証火氣十足，叫佢除咗件衫。「余律師」話除咗衫就有嘢睇，堅決不除。球証爛爆爆走開咗。好喇！「余律師」認真好腳法，帶波到娥眉月準備抽射，點知皇冠隊中突然殺出一名炮彈仔五號「細法院」。嘩！佢狼胎過華秀，竟然出手打人，一拳打到「余律師」訓低，跟住唔理三七廿一搶波直上，球証竟然視若無睹，濶佬懶理，搞到全場觀眾嘩然！「細法院」速度快，又打茅波，轉眼間已跌落艇仔隊的越位陷阱。哎呀！做七嘢球証好似盲過盲俠，七都睇唔到，旁証又翹居居担天望地！死啦死啦！球証快D吹雞喇，唔係艇仔隊就有啦！哎呀！冇啦！冇啦！「細法院」如入無人之境，舉腳勁射，力度驚人！守門員連波碌入網內，成三分鐘都起唔到身。球証舉手判佢射入，三比二皇冠隊領先！（裁判司署判艇戶無條件釋放，支持者簽守行為十八個月）。

大球場觀眾睇到眼定定，都唔知點反應。靜得三兩分鐘，突然有人大喊「打倒××」，掙一個玻璃樽入場，搞到呢場波火藥味

更重，差的踢不下去。（托派當日示威被捕）。好彩觀眾重守秩序，立刻有人清除垃圾，繼續開波。

艇仔隊好嘍嘍，點知天降福星，皇冠隊自亂陣脚，調咗個頭岳岳的「查王子」做後備。呢個「查王子」真係有譜，行行企企，得閒無事同龍門打牙較，搞到守門員要敷衍佢又要顧住個江山。艇仔隊見咗好機會，立即埋牙，大舉進攻，拉開對方防綫，前鋒「學生哥」在娥眉月勁射，角度刁鑽，但係彈柱而出。（三月四日向王子遞抗議信）。皇冠隊十人回防，沙塵滾滾，殺聲震天，艇仔隊耶穌「社工大兄」偷到個波，扭過「老差骨」，在禁區內用地波掃入！（三月廿四日抬棺抗議）呢一球的組織實在冇得頂，又斯文又有腦！好嘢三比三又再次打和！

今次弊！皇冠隊員好氣頂，吹鬚破眼，佢地颯起上嚟唔係人咁品！睇見時間無多，佢地嘅重炮手「大法官」立即披掛上陣，佢搏球証偏心，大打茅波，竟然雙手搶住個波直衝艇仔隊龍門，口中大喊：「你哋再贏我就扑濕你！」嘩！佢面露青光，咀裂鋼牙，成個科學怪人咁樣，嚇到觀眾與艇仔隊手足無措，暗自叫苦。「大法官」衝到龍門面前，一擰打到守門員腳軟，然後將個波碌入龍門，佢重大聲話：「四比三，皇冠隊贏波！」大鐘啱咗夠鐘，全場九十分鐘打完。

觀眾鼓噪萬分，媽聲四起，皇冠隊打完波就龜縮在更衣室，由領隊「姬達」出來做好做醜，向觀眾話：「好啦！算啦！我地雖然打得狼D，但係規矩即係規矩，算啦！唔好再嘈囉！」

艇仔隊話要上訴，幾大都唔罷休，佢地話呢場球賽被人「奸」咗，一定要「輝」到底。

頒獎人「督爺」行出來，望住班皇冠仔，唔知好笑抑或好喊，因為全場觀眾紛紛大呼：「唔公平！唔公平！你頒親獎我地就柴台！」「督爺」冇符，只好嘖嘖哦哦地行番座位。

睇起上嚟今日嘅球賽都有排至收科，究竟結果如何，我哋會用最快速度通知各位。今日就此拜拜。